

東華續錄

光緒一百二十八

臣朱壽朋敬編

臣潘鴻鼎恭校

閏五月辛丑朔諭李秉衡奏山東昌邑縣蠹役劉占玩平時貪毒狡詐兇惡早著上年秋間兵差過境該署縣張鴻憲備價飭令僱車該役聚眾刁難復向民間藉差訛詐小民受其搏噬不敢告發似此蠹役殃民最爲地方之害業經李秉衡提訊正法足昭炯戒第念山東如此他省恐亦不免著通飭各直省督撫隨時訪察如有蠹役殃民卽著從嚴懲辦以除積蠹而安良善○壬寅太僕寺卿林維源因病奏請開缺允之○甲辰孫毓汶因病奏請開缺不允予假一月調理○准大學士福錕致仕仍賞食全俸○以松壽爲山東按察使○諭刑部奏審明太監致斃人命按律定擬一摺太監門進幅著照該部所擬絞監候秋後處決○丙午調載灃爲鑲紅旗滿洲都統以依克唐阿爲鑲黃旗漢軍都統○以啟秀爲總管內務府大臣○丁未諭軍機大臣等有人奏浙省盜風熾肆請飭認真搜捕一摺據稱浙江洋面劫案疊出上年岱山剪刀坪一帶盜匪與台州漁戶構釁幾釀巨禍舟山航船去冬亦被行劫內地如鄞縣小溪大嵩奉化之忠義松林等處皆成盜藪慈谿縣城外本年春間被搶之家不下數十姓有盜首尤田難者在奉化

招集匪徒三四百人白晝搶掠出入乘坐官轎漁船出行必須領其盜照方可開駛等語果如所奏實爲地方之害著廖壽豐嚴飭文武員弁認真巡查實力搜捕以靖盜風並尤田雞一名嚴拿務獲從嚴懲辦縣官有諱飾消弭廢弛捕務者並著卽行奏參另片奏鎮海口防營徒糜帑項提督張其光昏耄廢弛副將費金綬知府馮相榮惟以吸食鴉片煙爲事參將鄧驄保日事賭博在營納妾並干預地方訟事總辦支應局縣丞吳元鼎挾妓侑酒毫無顧忌堵塞海口需用船隻木椿勒索浮冒等語著廖壽豐確切查明據實具奏毋庸徇隱至所稱此項防軍毫無紀律裁撤恐滋事端請飭籌備餉銀於資遣時派員押送用輪船載往原籍等語並著廖壽豐妥籌辦理免滋擾害原摺片均著鈔給閱看將此諭令知之○己酉諭軍機大臣等有人奏英山縣知縣尹允照蒞任後積案至四百餘起兩造併押令伊戚尤心芷至押所索錢又東鄉寶姓自縊一案濫刑索贓古山劉姓因挖石誤傷行人押至年餘得銀釋放招彈唱女子入署任令倚官爲勢致釀命案請飭查辦等語著福潤按照所參各節確切查明據實具奏毋庸徇隱原片著鈔給閱看將此諭令知之○諭御史易俊奏各省遊幕太多或報捐官職營謀薦引薦者祇顧私情不問賢否若輩自潔者少一經收錄恣意妄爲流弊不可究詰等語近來各省仕途冗雜人浮於事往往輾轉營求差使無非意圖牟利奔競成風於吏治民生殊有關繫嗣後中外大小臣工各宜遠嫌鄭重破除情

面不得仍蹈瞻徇故習致負朝廷澄敘官方至意○御史易俊奏抽釐一事雖屬不得已之舉而數十年來各省防營林立已爲籌餉大宗商民相安久忘擾累現值需款孔亟之際與其從旁搜括曷若就此認真整頓尙可歲增鉅帑不至病民也各省情形不同大要不患來源之少而患侵蝕之多不患比較之不嚴而患勸懲之不實臣請謹爲我皇上陳之各省釐差定限一年期滿名爲調劑非有勞績不能得委

其最優之釐差非勞績而兼有奧援者仍不能得委充斯差者大卡動獲萬金中卡或數千金小卡亦踰千金夫薪水能有幾何而此盈千累萬非作弊竇從何處得來固不待智者而知也其在稍知自愛之委員縱未必涓滴歸公尙能顧名思義若劣員則任意侵漁毫無忌憚司事有充司事之費巡丁有充巡丁之費試思司事巡丁有何銀賄賂委員乎亦不過取償於商民而已不知司事巡丁私取商民一二金則釐卡少收商民十餘金矣查部章有按年按卡切實比較以收數之盈絀定委員之功過如收數較多再令接辦其短收各員立予記過停委等語各省總局其始非不遵照辦理無如日久視爲具文責緣者雖多記過而不見撤差安分者雖多記功而不見留辦似此漫無賞罰人雖至愚孰不欲收多報少自飽饕餮乎委員徂於積習先私後公猶望釐金有起色也難矣擬請飭各省將軍督撫臣於釐金一切弊端認真釐剔並諭令戶部妥定章程咨行各直省以從前收數最鉅之年爲定額毋得藉詞減少其比較

數目委員姓名接辦年月按月報部以備稽查有一連兩季記過者卽行撤差不得徇情留辦有一連兩季記功者不獨留辦並准咨部獎給虛銜封典倘一連四季記功大卡長收至一萬兩以上中卡長收至五千兩以上小卡長收至二千兩以上者卽准分別酌保升階如此則貪得無厭者不能鑽營戀棧而潔清自好者尙得保獎酬勞庶人人勉力奉公儘收儘解比較之數自可逐漸加增第恐不肖委員既欲免過又圖肥己多方抑勒累及商民應由總局刊刻簡明告示徧行張貼如釐卡有額外需索故意留難情事准商民赴總局控告從嚴參處俾委員知所儆懼不敢違章罔利上有益於國計下無妨於民生矣

上諭御史易俊奏各省釐金積弊太多請飭妥定章程以杜中飽一摺著戶部議奏○癸丑新疆地震○命吳大澂開缺來京○諭爲政之要首在得人前諭中外臣工保薦人才業經次第擢用當茲時事多艱尤應遴拔真才藉資幹濟著各部院堂官及各直省將軍督撫等於平日真知灼見器識閎通才猷卓越究心時務體用兼備者臚列事實專摺保奏其有奇才異能精於天文地輿算法格致製造諸學必試有明效不涉空談各舉專長俾資節取該大臣等當念以人事君之義一秉大公詳加考核倘或苟且塞責謬採虛聲甚至援引私人瞻徇情面濫保之咎例有專條定惟原保之人是問○諭軍機大臣等有人奏疆臣貪婪荒縱據實糾參一摺據稱江西巡撫德馨利慾薰心宴樂成癖傳通內外消息以門丁吳子昌

爲首幕友朱姓助之元泰仁錢號經手過付屬員中則何其坦朱士林王書臣皆託心腹招權納賄萬載縣知縣周鳳藻貪滑巧詐屢有控案以重金請託得免上饒縣知縣朱錫祁藉訟婪贓該撫反濫行保薦去年冬間大作生日收受禮儀演戲月餘請飭查懲等語著張之洞按照所參各節秉公確查據實具奏毋稍徇隱原摺著鈔給閱看將此諭令知之○管廷獻奏開戶部以償欸太鉅請飭大學士六部九卿及各直省將軍督撫通盤籌畫一摺已奉旨允准伏思戶部爲財賦總匯酌盈劑虛何至束手無策部臣旣無辦法豈內外諸大臣果有辦法乎卽或有法亦不過曰加釐金也借商欸也裁廉俸也加鹽課也興礦務也修鐵路也用鈔票也稅間架也推廣捐例也夫天地生財止有此數我朝歲入之欸乾隆以前不過三千餘萬今則稅釐加徵增至七千餘萬矣列祖列宗有鑒前明末造之失丁賦之制有減無增遵行已久罔敢踰越目今雖無加賦之名而隱有加賦之實稅釐之入何一非小民之脂膏乎上之所獲日以多下之所蓄日以少若再行一切瑣屑補苴之政巧爲腴削無論億秬鉅欸爲數難盈恐閭閻貧匱衆志日離剝肉補瘡病日益甚暫支目前後仍不繼歲復一歲爲患何窮然則居今日而理財不在開源也亦節流而已不必變法也亦法祖而已乾隆以前歲入不過三千餘萬康熙年間三藩之變糜爛至七八省用兵至八九年未聞用不足也雍正乾隆年間大兵大役亦所時有未聞用不足也此外普

免天下錢糧者六次普免天下漕米者四次以及各省稍有偏災無歲不緩徵無歲不豁免其爲數不知幾萬而部庫常有七八千萬之儲以昔之所出計今之所入每歲應贏餘五千餘萬而部臣猶以拮据爲慮不知此五千餘萬者果皆實用實銷爲必不可少之款乎抑朦蔽侵蝕而盡付諸不可知之數乎爲今之計宜飭戶部將現在歲支之款與乾隆以前歲支之款澈底清查認真比較昔有而今無者何款昔無而今有者何款同一款也減於昔者何事增於昔者何事逐款分晰出具案語彙造清冊呈覽其昔有而今無者不計矣其昔無而今有者概從裁撤卽今昔同有而其事徒爲具文無關實用者並可酌量暫行停止皇上亦宜力求儉約所有宮中用度一概規復舊制不使稍有增加伏讀乾隆四十六年九月丁卯高宗純皇帝諭曰卽以內帑而論乾隆初年內務府大臣尙有奏撥部庫銀兩備用之事今則裁減浮費釐剔積弊不特無須奏撥且每歲將內務府庫銀令撥歸戶部者動以百萬計等語可見事無鉅細但能撙節務實自有明效大驗也以今之入款通盤籌畫使不得過乾隆以前歲出之數計每年可省銀四五十萬兩則二萬萬之賠款四五年卽可全清全清之後每年常餘四五十萬則釐金可裁而民困蘇矣廉俸可復而官累除矣捐納可停而流品清矣因以造船製礮整飭戎行何難恩周宇中威加海外乎惟是歷來糜費半由中飽積習既深固結難除今欲驟加裁減必將曰兵多於前餉不可缺

局員薪水不可省也南北洋辦理海防購買船礮營建學堂臺塢暨機器製造等局之要需難緩也夫養兵期有用耳昔時兵少而戰必勝攻必取今時兵多而坐困於區區之島夷則無用之兵宜汰也各省局員久奉 諭旨裁撤各疆臣因循瞻顧迄未奉行上年山東巡撫李秉衡到任伊始即將局員裁撤殆盡每年可省五六十萬金東省如此豈他省不能照辦乎各疆臣之意不過以候補人員過多留爲調劑計耳伏查乾隆四十九年有准各省試用人員補期尙遠者呈明回籍俟到班時仍赴原省補用之例卽今大挑知縣尙有截留咨取之例若通飭各該員之補期尙遠無力當差者回籍候補於諸員亦無所損何必以有用之帑項養此無數之閒員乎購買之船礮全歸烏有不必論矣學堂臺塢久告成矣機器製造等局創建已二十餘年不知所製者何物而應用船礮無一不購自外洋又何用此局爲也伏願 皇上赫然震怒全行裁撤如有掣肘而阻撓者便是 祖宗之罪人 國家之蠹賊立予嚴譴無少假借誠以當此創鉅痛深之際正 宵旰臥薪嘗膽之時欲求有益於 國無害於民舍此之外更無別策果能猛力振作則 朝廷不得已之苦衷更無難布昭於天下倘仍一味因循苟且補苴無論鉅欸難盈而所有之財上不在 國下不在民而全歸中飽之蠹卽歲入再加數倍庸有濟乎臣亦知積弊既深釐剔非易然際此時事艱難非改絃更張實無以收振弱起衰之效且率由舊章更覺有利無弊是以

不揣冒昧披瀝直陳 上諭御史管廷獻奏請節糜費以裕帑儲一摺著戶部妥議具奏○乙卯 上御
文華殿日本國使臣林董觀見○調德壽爲湖南巡撫以嵩崑爲貴州巡撫○李鴻章電致總理各國事
務衙門劉含芳元電今晚接文登何令金齡彭令王丞十二日稟稱日本兵在旅順染瘟疫急於到威委
員辰男十一日已派弁於威海城外標記民房今早往各村莊標記卑職等執條約與之力爭不能挽回
不得已卽代尋廟宇以及一切空房備日兵前來暫住伊嫌空曠器用俱無依然標記民房勢不可遏卑
職等無可如何祇好勸慰百姓令其忍讓一面催日本委員趕修兵房以便速行移動免其久擾居民民
間穀苗初長已與面商禁止人馬踐踏伊已應允土匪猖獗急於捕治但恐兵役執械日兵未免生疑卑
職等與該委員面商亦已應允且願協緝卑職等於十二日已時見辰男午後進劉公島見其水師統領
商辦一切據理直爭伊亦不能固執已見惟住民房一事卑職等才力短淺實難挽回理合據實馳稟再
頃辰男來云草廟營兵何以不遵條約遷徙該員明日必欲親自前往與其理論並約同行云云卑職等
以同去無益答以俟界限劃清必如約辦該員遇事恃強言出不由稍駁若不趁早綢繆將來大隊到此
必釀事端以其地圖核計上莊鄆館均在遷徙之內務望速賜酌奪等語查原約海灣沿岸日本五里計
核中國四十里草廟以威城計則在四十中里外以海灣算則在內昨交飛鯨帶呈稟圖乃威城四十里

外又添海灣四十里彼此界地更非原約所有應請速電總署與林大臣商定電屬該員一切如約由芳派輪送交爲妥今日旅順來船傳言瘟疫是實或今暫住廟宇空房一面由其速蓋兵房再行移住之處伏候電諭飭遵云鴻已鈔致伊藤電轉劉道該國武員多恃強生事馬關和約實由武員力持不讓此事未知伊藤能力阻否草廟現有東軍防營實在海灣四十里以內原約只有海灣無威城字樣恐東撫偏執不肯遷移必滋口舌祈奏明飭其照約辦理爲要奏入軍機大臣奉 旨李鴻章電奏接劉含芳電稱日本委員辰男以草廟營兵何以不遵條約遷徙來問經文登縣何金齡等稟請趁早綢繆等語馬關另約第二款在威海衛應將劉公島及威海衛口灣沿岸照日本國里法五里以內地方約合中國四十里以內爲日本國軍隊駐守之區現在草廟防營係在海灣四十里以內自應照約遷徙著李秉衡卽將防營擇地遷徙免滋口舌○丙辰李鴻章電致總理各國事務衙門頃電劉含芳元電所稱劃界一節不甚明晰如草廟以威城計在四十里外以海灣算則在內查原約只有威海口灣沿岸四十里以內爲日本軍隊駐守並無由威城起算之說草廟距海灣南岸僅三十里原駐防軍若不遷移顯係違約必啟衅端至稟呈日員劃界圖於距威四十里外又圈四十里據稱日兵不能越境華兵亦不能越是於中間留爲甌脫之地彼此免生嫌衅但原約並無四十里外又劃出甌脫若干里斷不能再圈至四十里之多今惟

先將海灣四十里內所駐東營移出另紮免其藉口生事再徐議甌脫應留若干里約明兩國兵均不能過界是在該員與委員等相機商辦隨時報聞云又急電稱劉含芳寒電今日已初彭令乘先鋒輪船回煙稟據日本委員辰男照會本官擬於冶口地方擇定營房於日歷七月初四日卽乙未閏月十三日派遣陸軍中衛帶兵十名前往該地過貴國東字營兵二十餘名云奉上官命駐紮又據該村民言草廟尙有兵二三百名本官查和約第二條由劉公島及威海衛灣沿一帶起日本里五里卽貴國四十里以內爲日本軍隊駐紮區域今此域內貴國兵駐紮實與條約不合請查照咨退卽速見覆等因卑職等當函告孫統領據稱無撫院行知不能移營奉統領並面告專差屬轉告王彭委員等以後如日兵到冶口定開鎗轟擊等語事關重大卑職等公同商議暫未能覆祇得承謨乘先鋒輪船回煙請示刻下鄉民已有驚避老幼哀哭於道路之狀合併稟明等語職道查彭令呈閱日本水峻辰男照會與所稟各節相同應如何飛電東軍統領孫萬林遵照之處伏候電諭飭遵云聞東撫前有嚴札沿海各營如未奉該撫札諭擅自移紮卽以軍法從事孫萬林紮營實在海灣南岸四十里以內若不移紮必開衅端務望速電飭遵勿遲誤生事總理各國事務衙門以聞得 旨李鴻章兩電均悉本日已諭知李秉衡東軍駐紮處所如在海灣南岸四十里以內卽應照約嚴飭防營毋得輕動免啟衅端至甌脫之說本爲原約所無不可因

彼現畫之圖勉強遷就轉生枝節○戊午諭軍機大臣等李秉衡電悉日兵暫駐威海我軍防營駐紮處所總以海灣南岸四十里爲斷如在四十里以內務當照約一律遷移免致彼族藉口著李秉衡查明里數妥爲商辦嚴飭孫萬林等毋得孟浪開鎗轟擊輕啟衅端是爲至要至日兵強佔民房一節昨已由總署照會林使並由李鴻章電問伊藤令其照約辦理矣○己未諭軍機大臣等李秉衡電已悉本日李鴻章電已接伊藤覆電云轉達兵部諭知軍隊司令官展緩赴威俟該處兵房起蓋完竣方行等語日兵既展緩赴威強佔民房之說自可無慮著李秉衡將四十里內外確數查明防營駐紮之處飭令孫萬林照約辦理該撫請仍駐萊州俟定局再行回省著照所請行○庚申諭敬信等奏遵保辦理團防出力員弁開單呈覽一摺著該部議奏○諭前據宗人府刑部會奏宗室錫鈞呈告御史鍾德祥家丁熊翼臣等訛詐銀兩牽涉本官當派徐桐剛毅會同審訊茲據訊明具奏鍾德祥雖無訛詐銀兩情事惟於錫鈞之賄求免參該御史收受贓私訊據熊翼臣等供詞業已衆證確鑿乃猶希圖狡卸捏稱郭松亭等赴津情弊顯然亟應確切根究以期水落石出鍾德祥著先行革職歸案審辦○癸亥諭吳大澂奏特參造言生事挾制統領之營官哨長請旨懲儆一摺寶捷營營官副將周吉斌哨長游擊朱正霖於該營裁撤時輒敢捏造謠言煽惑勇丁至鄭連泰寓所滋鬧實屬漫無法紀周吉斌朱正霖均著卽行革職并不准投効他

營以儆刁玩而肅紀律○總理各國事務衙門奏臣衙門查咸豐八年英約第五十一款內載嗣後各式公文無論京外不得提書夷字早經通行在案各國事同一律現據日本使臣林董函稱近聞京報摺內指稱島夷速請更正請旨飭禁等語臣等以中外既敦睦誼文字之間理宜慎重英約通行已久豈可視為具文相應請旨飭下京外各衙門嗣後一切公文仍不得提書夷字以符成約恭候命下臣等欽遵通行各衙門一體照辦得旨如所議行○甲子諭軍機大臣等人奏松江城內火藥局庫請擇地移建一摺據稱江蘇松江府城內建設火藥局庫炸彈無不充牣庫房逐漸增加為各路防營軍火總庫距衙署民居均在百步以內居民不無慄慄危懼且萬一稍有疏虞則全省軍火立形支絀請飭擇地妥為移建等語火藥為操防要需儲藏最宜慎重據奏各情所關非淺著張之洞奎俊派員相度地勢會同紳董將城內火藥局庫如何移置之處妥籌辦理將此諭令知之○諭御史聯錦奏劣員把持勒索請飭查辦一摺據稱理藩院司員通同書吏於圖什業圖親王等報効承襲各案取巧營私廢公索賄請旨飭查等語著理藩院堂官按照所參各節確切查明據實具奏○丙寅諭給事中褚成博奏各直省船械機器等局請飭各督撫招商勸辦以開利源等語著戶部議奏○丁卯諭軍機大臣等自來求治之道必當因時制宜制況當國事艱難尤應上下一心圖自強而弭禍患朕宵旰憂勤懲前毖後惟以蠲除積習力

行實政爲先疊據中外臣工條陳時務詳加披覽採擇施行如修鐵路鑄鈔幣造機器開各礦折南漕減兵額創郵政練陸軍整海軍立學堂大約以籌餉練兵爲急務以恤商惠工爲本源此應及時舉辦至整頓釐金嚴核關稅稽察荒田汰除冗員各節但能破除情面實力請求必於國計民生兩有裨益著各直省將軍督撫將以上各條各就本省情形與藩臬兩司暨各地方官悉心妥籌酌度辦法限文到一月內分晰覆奏當此創鉅痛深之日正我君臣臥薪嘗膽之時各將軍督撫受恩深重具有天良諒不至畏難苟安空言塞責原摺片均著鈔給閱看將此由四百里各諭令知之○己巳准廣西巡撫張聯桂開缺回籍○是月日本國新簡駐華使臣林董抵任

六月辛未以史念祖爲廣西巡撫○壬申調岑毓英爲雲南布政使以唐樹森爲貴州布政使邵積誠爲貴州按察使○癸酉曹志清奏直隸省差徭之繁重甲於天下常年雜差民力已苦不支去歲兵差絡繹州縣橫斂暴徵而民愈不堪命矣在朝廷動衆興師原屬萬不得已之舉卽借資民力小民等情殷報効亦所樂從無如不肖州縣藉差爲肥私之計胥役視差爲致富之奇敲骨吸髓毫無顧忌勒派之法不一有按牛馬捐者有按牌戶捐者有按村莊捐者明以要車爲名其實全行折價一馬一牛折錢百串及數十串不等下至一驢亦折十數串一牌一戶捐錢數十串及七八串不等甚至無衣無褐之戶亦捐錢

一兩串其按村莊捐者過三百戶爲大村捐錢二千串及一千串三百戶以下爲小村捐錢七八百串及五六百串甚至數十戶之村亦捐錢至二三百串合計大縣可捐數十萬串中縣小縣亦不下十數萬串驛路經行之處猶可言也甚至鄰近州縣亦藉幫差爲名依樣勒派硃符一標差役四出虎噬狼貪慘難言狀少不遂意立加拘比捐時本以買備車馬爲名其實盡以分肥及至兵差過境仍向有車馬之戶勒僱名發官價而層層剝蝕車戶所得無幾黠者賄役得免懦者久供差役必至車敝馬斃而後已尤可駭者去秋水災哀鴻遍野 皇上軫念民依撥款賑濟乃聞灤州樂亭各州縣將賑銀扣抵兵差聲言不足仍向民間苛派災黎謀食維艱又加此累多至轉於溝壑無所控告是民非困於災直困於貪吏之苛斂也查山東巡撫李秉衡懲辦蠹役藉差擾民一案遠近稱頌何以畿輔重地民間受累如此未聞少加懲辦耶請明降 諭旨嚴申厲禁以儆效尤並 飭督臣王文韶密查侵扣勒派各州縣從嚴參辦庶貪污稍知斂跡而民困日蘇矣伏思州縣之敢於勒派實由直隸之辦差向無一定章程故弊端百出查原任大學士閻敬銘有議減川陝山西河南差徭章程既不累官亦不病民請 飭督臣查照辦理未始非整頓吏治之端也 上諭御史曹志清奏直隸州縣藉差勒派請飭查禁等語州縣差徭借資民力原應妥定章程免致閭閻被累若如該御史所奏勒捐強派官吏層層剝扣任意魚肉灤州樂亭等處並將賑銀

扣抵兵差擾累情形殊堪痛恨著王文韶查明侵賑勒派各州縣從嚴參辦毋稍姑容並議定差徭章程以杜弊端而蘇民困○曹志清奏直隸盜賊充斥日甚一日搶劫之案層見迭出畿輔萬方輻輳行旅皆有戒心從前輜重多者每至被劫近則一肩行李亦多不免從前搶劫多在昏夜近則白晝肆行強暴早路則騎馬持械倏忽往來水路則沿船搜賊冒充官役順天保定天津河間等屬所在皆有而莫甚於深冀兩州盜賊同夥百十人或四五十人或二三十人公行搶劫毫無顧忌倘不得財物則擄掠人口以去女則價賣男則關禁勒贖如無人贖卽行殺害一經報官非置之不理卽反向事主誅求間有批准飭緝之案亦止奉行故事被害之人怕受官司之累往往不行呈報以致賊匪視劫奪爲固然藐王法若無有大抵盜賊恃捕役爲護符捕役卽以豪賊爲生路而不肖牧令又多以諱盜爲規避處分之計不以捕盜爲事反恐治盜於己不利故盜賊朋行搶劫而莫敢誰何現在饑民遍野游勇成羣不加懲治必至日聚日多養成巨患相應請 旨飭下督臣嚴飭各府州縣認真緝捕勿託空文以圖塞責勿縱捕役豪賊自利倘有怠玩不職之員立行參辦庶盜風日戢而閭閻安堵矣 上諭御史曹志清奏直隸盜賊充斥請飭認真緝捕等語州縣諱盜處分甚嚴若如該御史所奏順天天津河間等處搶劫之案層見迭出深冀兩州各屬聚盜尤多甚至擄掠人口價賣勒贖一經稟報該州縣規避處分反向事主誅求間有准緝之

案亦止奉行故事似此規避處分必致養癰貽患著王文韶嚴飭各府州縣認真緝捕勿得徒託空文縱令捕役養賊圖利倘有怠玩不職之員立行參辦務期盜風日戢閭閻安堵用副除暴安良至意○甲戌准兵部尚書孫毓汶開缺調理○乙亥諭軍機大臣等戶部奏需餉孔殷謹陳辦理情形一摺覽奏均悉現因償欸過鉅息借洋欸每年籌還本息約須一千五六百萬各路防軍未能盡撤需餉亦繁亟須預爲籌備該部所擬考核錢糧整頓釐金皆屬切實可行著各直省將軍督撫查照該部所擬認真妥辦據實具奏又裁改兵制一條擬令各省挑留精壯三成其餘老弱一概裁撤著該督撫各就地方情形悉心妥籌核實裁汰奏明請旨辦理該將軍督撫皆身受國恩務當體念時艱共矢公忠力圖補救不得瞻徇遷就畏難苟安僅以一奏塞責是爲至要該部另單所陳各條除停放米折一項本日已有旨令八旗都統議奏如鹽斤加價裁減局員薪費重抽煙酒稅釐各條並著該督撫一體實力舉行以期有裨急需原摺單均著鈔給閱看將此諭知戶部並由四百里各諭令知之○恩澤奏吉林地處邊隅倚山濱海夙爲遁逃淵藪二十年來重法懲治之盜犯數以千計而劫掠仍不稍戢推求其故蓋因齊魯之莠民航海而來者每年不下數萬直北之教匪餘黨潛蹤蒙古部者實繁有徒通名之曰跑骹不能服苦耒耜得間卽嘯聚搶劫狼奔豕突飄忽靡定此拿彼竄終未淨絕根株奴才蒞任後留心檢查各屬詳報盜案邀劫道路